

«Library of Sculpture» da Vaclav Pozarek

Exposiziun actuala en il Museum d'art dal Grischun a Cuira

■ (mc) La villa Planta nua che sa chatta oz il Museum d'art grischun è vegnida construida oriundamain sco chasa d'abitar privata. Actualmain ha l'artist Vaclav Pozarek che viva a Berna installà en il Museum d'art grischun ses project «Library of Sculpture» che tematisescha l'istorgia da la sculputura. Tenor il nov directur *Stephan Kunz* vul il project «Library of Sculpture» determinar da nov il character anteriuramain privat da las stanzas. Per la «Library of Sculpture» installescha *Vaclav Pozarek* ina gronda biblioteca cun tut ils indrizs che tutgan tier en l'emprim plaun da la Villa Planta. Sias mobiglias sculputuralas furman in'installaziun tridimensiunala. Sin curunas, maisas, pults e sochels preschenta l'artist sia collecziun da cudeschs e da fotografias. A medem temp mussa el atgnas lavurs da quest context sco er models e dissegns d'ina instituziun fictiva ch'è deditgada dal tuttatfatg a la sculputura. «En quels sa manifestescha in concept da sculputura cumplexiv che unescha posiziuns e linguas d'expressiun cuntradictoria», di *Stephan Kunz*. Quest concept cuntrafetschia uschia a la moderna cun sias disposiziuns e valurs cleras ed oppona in sistem da referenza avert.

Per l'exposiziun cumpara er in cudesch cun numerus chaus characteristics da l'istorgia da la sculputura – or da l'optica subjectiva radicala da *Vaclav Pozarek*. In supplement cun maletgs ed essais documentescha ils connexs da sia biblioteca d'artist singulara.



Vaclav Pozarek

L'artist Vaclav Pozarek ch'è naschì l'onn 1940 è daventà enconuscent cunzunt tras sia ovra sculputurala. Quella cumbinescha elements constructivs e conceptuels cun in sistem da referenza che schlia en moda divertenta la logica e la sistematica memia severa. Main enconuscent è ses grond archiv davart la sculputura che datescha da l'antica fin al temp dad oz. Quest archiv stat en il center da l'exposiziun e vegn preschentà per l'emprima giada en il Museum d'art grischun. Durant blers onns ha Vaclav

Pozarek rimnà e furmà questa collecziun voluminusa. Ella na metta betg mo ses agen art en in rom pli grond, mabain avra in vair museum imaginar da sculputura.

Collecziun dal Museum d'art

La collecziun dal Museum d'art grischun cumpiglia ovras da tut ils secturs da l'art figurativ dal 18avel tschientaner fin al temp dad oz, oravant tut lavurs d'artistas ed artists dal Grischun sco er d'artistas ed artists internaziunals che han in connex cun il Grischun. A cha-

schun da l'installaziun da la «Library of Sculpture» en la Villa Planta vegn la collecziun pendida si da nov. Ensemen cun acquisiziuns novas vegn preschentada ina selecziun represchentativa da la collecziun.

Partind dal sbos per ina tessaria dad Ernst Ludwig Kirchner che sa numna «La vita/Das Leben» mussa il Museum d'art grischun per l'emprima giada in dumber pli grond da dissegns e da lavurs sin palpi da si'atgna collecziun e collia uschia ovras da differents temps e temas da differents connexs da la vita.

Aertura ils 17 da favrer 2012

La vernissascha da l'exposiziun ha lieu venderdi, ils 17 da favrer a las 18.00. L'exposiziun cuzza enfin ils 6 da matg 2012 da mardi fin dumengia da las 10.00 fin las 17.00 e gievgia da las 10.00 fin las 20.00. Glindesdi è serrà.

Las gievias dals 23 da favrer, 8 da mars, 29 da mars, 19 d'avrigl, 26 d'avrigl ed ils 3 da matg han lieu mintgamai a las 18.00 visitas guidadas.

Retscha da referats

Plinavant han lieu en il rom da l'exposiziun «Library of Sculpture» ed en collavuraziun cun la Biblioteca chantunala ina retscha da referats e quai la gievgia a las 19.00. A referir vegnan ils 8 da mars *Jan-Andrea Bernhard* davart «Bibliotecas en chasas patrizianas dal Grischun: med da represchentaziun da l'aristocrazia u med da lavur da scienziats». La gievgia dals 15 da mars sa deditgescha *Dorothee Bauerle-Willert* a «La biblioteca dad Aby Warburg: in laboratori da l'istorgia culturala e dal maletg». *Iso Camartin* vegn a referir ils 19 d'avrigl davart «La biblioteca da Babel. Ils cudeschs reals ed imaginars da Jorge Luis Borges». Ils 26 d'avrigl referescha *Max Wechsler* davart «Il museum John Soane a Londra» e gievgia, ils 3 da matg referescha *Susanne Bieri* davart il tema: «Sa deditgà a l'archiv artistic».

Plinavant han lieu tut en tut 6 ateliers per uffants.

Ulteriuras infurmaziuns:
www.buendner-kunstmuseum.ch

La pedagoga da museums **Alexa Giger** ha preschentà il program annual 2012 dal Museum d'art dal Grischun. FOTO R. CANAL